

10-16

K34/28

Diletšō tša Basotho.

Basotho ba pele le bōna ba bile le diletšō tše dintšinyana, tša mehutahuta. Di be di letšwa ka molaō, ke xore, tše dingwē byaloka moropa, di be di sa dumēlélwa xo letšwa ka mabaka ohle. Tše dingwē tša diletšō ke ōna moropa, lengwane, lekope, sekxapa, lekwala (kwadi) phalafala, mokodie le lesiba.

Moropa ke seletšō se se dirwaxo ka dilō tše 'pedi; xo tšewa kōta ya thitō ya morula, e budiwe ka thokō engwē, e fadiwe ka xare; ka thokō ye e butšwexo xo bapolwa lethalō la pudi le le thošitšwexo bōya. Lebakeng la xe xo bolotšwa (xwerišiwa) bašimane moropa o iletšwa xo lla; xe xo bolla (rupa) basetsana moropa o bulēlwa xore o ka lla bošexo le mosexare; bale (basetsana ba ba rupaxo) ba rōbatšwa ka moropa, ba itiša ka ōna, ba tsošwa ka ōna; dikoša tša Sesotho xe di binwa xo letšwa seletšō se xore babini baopedi le bahlabeledi ba seke ba ba lahlaxēlwa ke ditiō xoba mošito wa koša; le mašoboro xe a bina, mošitō wa koša o laolwa le moropa le xo maxofsi a baopedi.

Lengwane ke naka ye e letšwaxo ke mašoboro; mašoboro ke bašimane ba ba seš'oxo ba bolotšwa. Ba tšea lešapō la serope sa pudi, le hlatswiwe, ka utlō le ka xare, le thibiwe ka motu ka thokō engwē le letšwa ka molomo. Lōna le dumeletšwe xo lla ka mehla xe beng ba lōna ba rata. Bōna beng ba lōna ba bitšana ka lōna, ba roxakana ka lōna, ba tliša koša ka lōna. Bōna ba hlaloxanya meletšō yohle ya lōna. Xe mollō wa lōna e le wa

2. thoxakō, xoba wa pitšō, beng ba lōna ba tseba; ka 'baka leo ke xantšī xe xo hwetšwa mašoboro a ka baxo a mabedi ba kxakxathana ka dithupa tša merethwa, e mongwē a rile xo e mongwē a re: "O uthoxile ka lengwane".

Sekxapa le sōna ke seletšō sa mašoboro. Xo tšewa lexapana, le tlemelelwe ka xo dudišwa ka maraxō mo thupeng ye e kobilwexo byaloka bora (bow) bya mosēbē; xomme se letšwa ka xo itiya-itiya lenti le le kobilexo thupa; lenti le itiwa-itiwa byalo ....

byalo ka phatana e thsesane mo, le mola, menwana ya seatla le yôna e ntše e memetšwe tirô ye, ka kxoma-kxoma lenti le.

Ba Lesotho seletšô se ba se bitša thomo. Se na le melodi e kwalaxo xa botse xe se letšwa ke ba ba se hlaloxanyaxo.

Kwadi ye e bitšwaxo lekwala ke ba moletlane le yôna e sa le seletšô sa mašoboro. E dirwa ka lehlaka la lebêlê, lenti, le phatsana ya thitô ya lefofa la lefexô la nonyana e kxolo, byaleka ntšu, mmankxodi, xoba leakabosane. E letšwa ka molomo. Xo thwe xe e lla e re: "Tlêkonko-tlêko, mantlêkwane!"

Lekope ke selô sa makxarebê; le masôxana a se letša. Thupa ya lôna e kobiwa ka motatô. Melodi ya lôna e monate; le letšwa byaloka sekrapa. Matebele a Moletlane a le bitša setôntôlô.

Phalafala ke seletšô se sexolo sa sethšaba. Ba bangwê ba se bitša lepotata, ba bangwê lepatata. Xantši le dirwa ka lenaka la phôôfôlô e kxolo byaloka thôlô, le tše dingwê. Xaxolo e bolokiwa mošatê, xoba motseng wa kxošana.

3. Xe e lla, motse o a huduêxa, xobane xa e ka ke ya llêla lefêla. Xe phalafala e lla xo sa tsebiwe se e se leletšwaxo, banna ba phalalêla mošatê ba feleletše ka dithlamô tša bôna tša thlabanô; e letšwa xe xo tšwiwa lesolo; xe banna ba ya thlabanong xo letšwa phalafala; xe xo tšwiwa lesolo la xo tsoma xoba la xo bolaya tau, nkwê, xoba se sengwê se se boifišaxo xo letšwa phalafala. Xe xo na le monyanya wa xo nthša kôma ya bašimane le xo e aloša xo letšwa phalafala; xe xo le mokete wa lenyalô la ngwana wa ka mošatê phalafala e ka letšwa. Letšatši la xo lla xa phalafala xa le lebalwe mo ditiraxalong tša sethšaba. Xe banna ba bowa ntweng, ba fentše ba tsêna motseng wa mošatê, monna a fofêla xodimo, mahlô a xaxwê a šetše a fetoxile eka ke dikxabo tša mollô, a hlakêla, a swere kôtsê, lerumô, le 'lêtswana sa maxaxana, a taboxa, a be a fihla a re pele xa kxôró, thšimê-thšimê - ê - ê -, a hlaba fase ka lerumô, a be a šupa ka lôna felô kua a hlabanexo xôna, a rêmakanya lefase ka selêtswana,

a ....

ser. 140.

K34/28

3 cont.

a bile a thōma xo ithēta le xo rēta kxoši ya xaxwē, phalafala e ntše e re: "Pu-du-bu-du-du-u-u - pu-pu-u-u-!" Phalafala ke seletšō se se tsebisaxo batho tiraxalō e kxolo mo motseng xoba mo sethšabeng.

ENDS.140